

25 NOV 1996
Apec - Sidang
SIDANG KEMUNCAK PEMIMPIN APEC BERMULA

TELUK SUBIC, 25 Nov (Bernama) -- Sidang kemuncak bagi pemimpin Kerjasama Ekonomi Asia Pasifik (APEC) di sini berlangsung pagi ini.

Kesemua 18 pemimpin yang menghadiri sidang itu memakai "barong tagalog", pakaian kebangsaan Filipina bagi mesyuarat tahunan keempat mereka.

Perdana Menteri Malaysia Datuk Seri Dr Mahathir disambut oleh Presiden Fidel Ramos setibanya di Leaders Hall of the Apec Village di Cubi Point.

Pemimpin yang menghadiri sidang kemuncak itu ialah Perdana Menteri Australia John Howard, Sultan Hassanah Bolkuah, Perdana Menteri Kanada Jean Chretien, Presiden Chile Eduardo Frei Ruiz-Tagle, Presiden China Jiang Zemin, Perdana Menteri Jepun Ryutaro Hashimoto.

Pemimpin lain ialah Presiden Korea Selatan Kim Young-Sam, Presiden Mexico Ernesto Zedillo Ponce de Leon, Perdana Menteri New Zealand Jim Bolger, Perdana Menteri Papua New Guinea Sir Julius Chan, Perdana Menteri Singapura Goh Chok Tong, wakil kerajaan Taiwan Dr Koo Chen Fu, Perdana Menteri Thailand Banharn Silpa-Archa dan Presiden Amerika Syarikat Bill Clinton.

Teluk Subic yang dahulu pangkalan tentera laut tentera Amerika sekarang telah bertukar wajah menjadi zon ekonomi khas terdiri daripada taman perindustrian, hotel dan pusat perdagangan.

The Leaders Hall, yang dahulu menjadi rumah kelab bagi anggota tentera laut Amerika, telah dibina semula menjadi dewan persidangan.

Para pemimpin APEC akan membincangkan isu-isu perdagangan dan bercadang untuk menubuhkan kawasan perdagangan bebas bagi rantau itu.

Isu penting membabitkan negara anggota termasuk kemasukan anggota baru dalam APEC, Perjanjian Teknologi Maklumat (ITA) dan mesyuarat Pertubuhan Perdagangan Sedunia (WTO) di Singapura bulan depan juga akan dibincangkan.

Selepas disambut oleh Presiden Ramos, para pemimpin itu bergambar reramai-ramai diikuti dengan sesi perbincangan pada sebelah pagi.

Pada tengah hari, Ramos akan membacakan Deklarasi Manila yang menggariskan rancangan ekonomi APEC sehingga sidang kemuncak akan datang di Vancouver tahun depan.

Para pemimpin itu juga akan memasukkan kenyataan tentang pendapat mereka mengenai ekonomi negara masing-masing pada 2010 dalam kapsul masa, Kenyataan setiap pemimpin itu tidak melebihi 1,000 perkataan dan ditulis pada kertas manuskrip.

Kapsul itu akan dimateri dan kemudian disimpan di Muzium Nasional Filipina.

-- BERNAMA
SHY MAM